

VENDIM
Nr. 214, datë 20.12.2019

**PËR NJË NDRYSHIM NË “RREGULLOREN PËR PROCEDURAT E BLERJES SË
ENERGJISË ELEKTRIKE PËR MBULIMIN E HUMBJEVE NË RRJETET E
SHPËRNDARJES DHE TË TRANSMETIMIT DHE PËR BLERJEN E ENERGJISË
ELEKTRIKE PËR TË SIGURUAR PËRMBUSHJEN E DETYRIMEVE TË
SHËRBIMIT PUBLIK”**

Në mbështetje të nenit 16, nenit 19, germa 1, nenit 69, germa “ë”, të ligjit nr. 43/2015, “Për sektorin e energjisë elektrike”, i ndryshuar; nenit 5, të VKM-së nr. 244, datë 30.3.2016 “Kushtet për vendosjen e detyrimit të shërbimit publik, që do të zbatohen ndaj të licencuarve në sektorin e energjisë elektrike, të cilët ushtrojnë aktivitetin e prodhimit, transmetimit, shpërndarjes dhe furnizimit me energji elektrike”, i ndryshuar, dhe “Rregullave të tregut shqiptar të energjisë elektrike”, miratuar me vendimin e Bordit të ERE-s nr. 139, datë 15.8.2016, nenit 21, të “Rregullores për procedurat e blerjes së energjisë elektrike për mbulimin e humbjeve në rrjetet e shpërndarjes dhe të transmetimit dhe për blerjen dhe shitjen e energjisë elektrike për të siguruar përmbushjen e detyrimeve të shërbimit publik”, miratuar me vendimin e Bordit të ERE-s nr. 103, datë 23.6.2016, nenit 26 të “Rregullave të organizimit, funksionimit dhe procedurave të ERE-s”, miratuar me vendimin e Bordit të ERE-s nr. 96, datë 17.6.2016, Bordi i ERE-s në mbledhjen e tij të datës 20.12.2019, mbasi shqyrtoi relacionin me nr. 119/6, prot., datë 18.12.2019 të hartuar nga drejtoritë teknike, mbi shqyrtimin e kërkesës së OSHEE sh.a., për një ndryshim në “Rregulloren për procedurat e blerjes së energjisë elektrike për mbulimin e humbjeve në rrjetet e shpërndarjes dhe të transmetimit dhe për blerjen dhe shitjen e energjisë elektrike për të siguruar përmbushjen e detyrimeve të shërbimit publik”,

konstatoi se:

- Bordi i ERE-s, me vendimin nr. 123, datë 29.7.2019, ka filluar procedurën për shqyrtimin e kërkesës së OSHEE sh.a., për një ndryshim në “Rregulloren për procedurat e blerjes së energjisë elektrike për mbulimin e humbjeve në rrjetet e shpërndarjes dhe të transmetimit dhe për blerjen dhe shitjen e energjisë elektrike për të siguruar përmbushjen e detyrimeve të shërbimit publik”.

- Pas kësaj vendimmarrje me shkresën nr. 436/1 prot., datë 14.8.2019, u është kërkuar palëve të interesit Ministrisë së Infrastrukturës dhe Energjisë (MIE), Autoriteti i Konkurrencës (AK), Operatorit të Sistemit të Transmetimit (OST) sh.a., Sekretariatit të Komunitetit të Energjisë, Shoqatës së Furnizuesve të Energjisë (AAES) e për dijeni të Operatorit të Sistemit të Shpërndarjes (OSHEE) sh.a. mendimi mbi propozimin e Operatorit të Sistemit të Shpërndarjes (OSHEE) sh.a., si dhe është caktuar si detyrë për OSHEE sh.a., “të japë sqarime që lidhen me ndryshimet e propozuara, në lidhje me kushtet e shpalljes së ofertës për blerjen e energjisë elektrike, si dhe kushtet e negociimit të afatit të pagesave, duke garantuar një proces të drejtë e të ligjshëm për të gjithë tregtarët pjesëmarrës”.

- Në vijim të sa më sipër dhe detyrave të lëna në pikën 2, të vendimit sipërcituar, OSHEE sh.a. me të sajën 14321/3, i është përgjigjur kërkesës së ERE-s, duke riformuluar propozimin e saj e duke shpjeguar se “Bazuar në kostot e parashikuara të energjisë nga analiza që do të bëhet lidhur me koston e blerjes së energjisë në treg të lirë (pas konfirmimit nga Shoqëria KESH sh.a. të sasisë së energjisë elektrike për klientët tariforë (dhe për humbjet nëse do të ketë mundësi), OSHEE-ja do të kryejë analizat financiare për periudhat në vijim me qëllim vlerësimin e aftësisë paguese të OSHEE-së, duke vlerësuar të ardhurat dhe shpenzimet e pritshme. Bazuar në këtë analizë, OSHEE-ja do të përcaktojë afatet e mundshme për pagesën e detyrimeve të blerjes së energjisë elektrike në treg të

parregulluar, afat i cili do të variojë nga 30–180 ditë, nga dita e fundit e lëvrimin të energjisë elektrike”.

- Për sa më sipër, shpjeguar nga OSHEE-ja sh.a., kjo e fundit ka kërkuar riformulimin e propozimit për të cilin Bordi i ERE-s ka filluar procedurën me vendimin nr. 123/2019 si më poshtë:

“Pagesa do të bëhet në përputhje me afatin e përcaktuar në ftesën për pjesëmarrje, afat i cili do të vendoset rast pas rasti në përputhje me mundësitë financiare likuiduese të shoqërisë”.

- Në vijim të vendimit të Bordit të ERE-s nr. 123/2019, në zbatim të rregullores së organizimit, funksionimit dhe procedurave të ERE-s, me shkresën nr. 436/1 prot., datë 14.8.2019, u është kërkuar palëve të interesit Ministrisë së Infrastrukturës dhe Energjisë (MIE), Autoriteti i Konkurrencës (AK), Operatorit të sistemit të transmetimit (OST) sh.a., Sekretariati i Komunitetit të Energjisë, Shoqatës së Furnizuesve të Energjisë (AAES) e për dijeni të Operatorit të sistemit të shpërndarjes (OSHEE) sh.a., mendimi mbi propozimin e riformuluar të OSHEE-së.

- Në përfundim të afatit 15-ditor për marrjen e opinionëve dhe komenteve të palëve të interesit në lidhje me këtë vendimmarrje në ERE janë paraqitur opinionet e Operatorit të Sistemit të Transmetimit (OST) dhe Shoqatës Shqiptare të Furnizuesve të Energjisë (AAES), dhe jashtë afatit të pritjes së komenteve është përcjellë edhe opinioni i Autoritetit të Konkurrencës, të cilët shprehen si në vijim.

- Operatorit të Sistemit të Transmetimit (OST) sh.a. shprehet se nuk ka kundërshtim për ndryshimet e propozuara nga Operatori i Sistemit të Shpërndarjes (OSHEE) sh.a. për sa u përket procedurave të blerjes së energjisë elektrike nga subjekti në fjalë.

- Shoqata AAES, me shkresën nr. 15 prot., datë 29.8.2019, parashtron qëndrimin e saj si në vijim:

- Blerja e energjisë elektrike që realizohet nga OSHEE sh.a. nga kompanitë tregtare të energjisë elektrike realizohet me rregulla të miratuara nga ERE, por kjo blerje nuk është një blerje e rregulluar pasi çmimi që ofrojnë kompanitë tregtare të energjisë elektrike është një çmim i lirë tregu dhe jo subjekt i rregullimit. Në këto kushte konstatojmë se rregullat e miratuara nga ERE për blerjen e energjisë elektrike nga tregu i parregulluar kanë garantuar, konkurrencën, transparencën dhe trajtimin e barabartë të ofertuesve.

- Çdo ndryshim i rregullores së blerjes së energjisë elektrike që aplikon OSHEE sh.a. duhet të përcaktojë se afatet për pagesat duhet të jenë të njohura për kompanitë tregtare, në mënyrë që të sigurohet transparenca e procesit, të jenë të njëjta për të gjithë pjesëmarrësit, në mënyrë që të mos lejohet diskriminimi i pjesëmarrësve në procedurë dhe të nxitet konkurrenca ndërmjet pjesëmarrësve në këto procedura.

- Më tej, AAES-ja ka pretenduar se marzhet mesatare në tregtimin e energjisë elektrike në rajon (Evropa Juglindore) janë më shumë se dhjetë herë më të ulëta se ato në tenderët e OSHEE-së, që do të thotë se nivelet e marzheve të çmimit të blerjes të OSHEE-së nuk mund t’u atribuohen faktorëve të tjerë ekonomikë, përveç afateve të gjata të paarsyeshme të pagesave të vendosura nga OSHEE-ja.

- Analiza e bërë nga AAES-ja është pjesore dhe vlerësimet e dhëna për tregun rajonal të energjisë nuk janë shoqëruar me dokumentacion mbështetës për të mundësuar verifikim e vërtetësisë së këtyre shifrave dhe të dhënave të paraqitura nga AAES-ja. Në këto kushte, nuk mund të vlerësohet nëse të dhënat e paraqitura dhe analiza e tregut rajonal e bërë nga AAES-ja është e bazuar në shifra me burime të njohura dhe të konfirmuara.

- AAES-ja, pretendon se OSHEE sh.a. gjatë periudhës 2017–2019 (janar–shtator) ka blerë energji elektrike në tregun e parregulluar nga kompanitë më shumë se shifra e analizuar nga AAES-ja, dhe që arrijnë dhe në 40 % të gjithë energjisë elektrike të hedhur në rrjetin e shpërndarjes, duke bërë që të ketë ndikime negative në çmime, pasi ndikojnë në rritjen e tyre. Të dhënat ku bazohet ERE për këtë analizë duhet të jenë të publikuara në faqen zyrtare të ERE-s.

- AEES-ja shprehet se “pjesëtarët e tregut nuk do të mundën të menaxhojnë rreziqet që burojnë nga pjesëmarrja në procedurat e OSHEE-së, dhe mundet që, në mënyrë të arsyeshme, të prezumojmë që numri i pjesëmarrësve në këto procedura, në terma afatgjatë pagese, do të ulet ndjeshëm”.

- Vlerësimi i shprehur nga AAES-ja lind për konkurrencën në procedurat blerjes së energjisë elektrike në tregun e parregulluar. Në këto kushte vlen të theksojmë se konkurrenca lidhet ngushtë me transparencën dhe aplikimin e rregullave të barabarta për të gjithë pjesëtarët në procedurat e blerjes së energjisë elektrike në tregun e parregulluar. Aktualisht rregullorja e miratuar nga ERE për procedurat e blerjes së energjisë elektrike garanton transparencën dhe trajtimin e barabartë të shoqërive tregtare që marrin pjesë në procedurat e shit/blerjes së energjisë elektrike në OSHEE sh.a., dhe kjo del qartë në të dhënat e publikuara në faqen zyrtare të ERE-s për periudhën janar 2017–shtator 2019 ku numri i shoqërive tregtare të cilat kanë furnizuar me energji elektrike OSHEE sh.a. nga tregu i parregulluar është mbi 10. Në këto kushte vlerësojmë se rregullorja e miratuar nga ERE për procedurat e blerjes së energjisë elektrike nga OSHEE sh.a. ka garantuar konkurrencën.

- AK-ja, me shkresën nr. 796 prot., datë 6.12.2019 bën me dije vendimin nr. 659, datë 21.11.2019 të autoritetit, duke u shprehur si në vijim:

- “Operatori i Shpërndarjes së Energjisë Elektrike është operatori i vetëm në tregun e shërbimit të shpërndarjes së energjisë elektrike, pra, është monopol natyror dhe si i tillë tarifën e aplikuarë prej tij duhet të pasqyrojnë drejt parashikimet ligjore lidhur me afatin e kontratave për çmimin e blerjes së energjisë, bazuar në një kthim të arsyeshëm, një kohëzgjatje të arsyeshme të përcaktuar dhe të miratuar nga ERE”.

- Në kuptim të sa më sipër, pozita dominuese së cilës i referohet AK-ja, lidhet me administrimin e rrjetit të shpërndarjes, i cili është monopol shtetëror, por edhe detyrimit të ngarkuar në mënyrë ekskluzive për sigurimin e shërbimit universal, në kuptim të VKM-së nr. 244/2016, i ndryshuar.

- Sa i përket sqarimit lidhur me tarifën e aplikuarë nga OSHEE sh.a., sqarohet se tarifën e aplikuarë nga OSHEE sh.a., me qëllim shërbimin e furnizimit në cilësinë e Furnizuesit të Shërbimit Universal, janë ato që përcakton ERE në zbatim të parashikimeve të nenit 85, të ligjit nr. 43/2015 “Për sektorin e energjisë elektrike”, i ndryshuar.

- Lidhur me kërkesën e AK-së për një kthim të arsyeshëm sqarohet se operatorët e tregtimit të energjisë elektrike që operojnë në kushtet e tregut të parregulluar, nuk operojnë mbi bazat e një çmimi të rregulluar nga ERE, por kanë të gjithë lirinë tregtare për të caktuar apo negociuar çmimin e shitjes së energjisë elektrike. Në lidhje me impaktin që rritja e çmimit, do të ketë me vendosjen e çmimeve të padrejta të blerjes apo shitjes së energjisë elektrike apo kushteve të tjera të padrejta të tregtimit, sqarohet siç sjellë në vëmendje në shpjegimet e dhëna më sipër mbi pretendimet e shoqatës së furnizuesve AAES, se vendosja e kushteve dhe afateve të njëjta për blerjen e energjisë elektrike nga tregtarët në treg të parregulluar, nuk vendos në kushte diskriminuese asnjërin prej tyre. Në kuptim edhe të praktikave më të mira tregtare, por edhe parimeve të përgjithshme mbi të cilat zhvillohen prokurimet publike, në kuptim të ligjit nr. 9643, datë 20.11.2006 “Për prokurimin publik”, me shpalljen e kushteve dhe afateve të ftesës për ofertë, nga ana e OSHEE-së, synohet të sigurohet një trajtim i barabartë dhe jodiskriminues për të gjithë operatorët ekonomikë, pjesëmarrës në procedurat e prokurimit.

- Në vendimin e saj nr. 659, datë 21.11.2019, AK-ja ka vendosur t’i rekomandojë ERE-s që gjatë procedurës së miratimit të një ndryshimi në rregulloren për procedurat e blerjes së energjisë elektrike për mbulimin e humbjeve në rrjetet e shpërndarjes dhe të transmetimit dhe për blerjen e energjisë elektrike, për të siguruar përmbushjen e detyrimeve të shërbimit publik, të marrë në konsideratë:

1. Shqyrtimin e procedurave të aplikimit për blerje të energjisë elektrike për mbulimin e humbjeve në rrjetet e shpërndarjes dhe të transmetimit dhe për blerjen e energjisë elektrike, konform

parashikimeve dhe afateve të përcaktuara në pikën 1, neni 21 të “Rregullores për organizimin, funksionimin dhe procedurave të ERE-s”.

2. Të kërkohet dhe të përcaktohet qartë periudha tranzitore për aplikimin e ndryshimit të kërkuar nga ana e OSHEE sh.a. në blerjen e energjisë në përputhje me parashikimet ligjore të lidhura me afatin e kontratave për çmimin e blerjes së energjisë, bazuar në një kthim të arsyeshëm, një kohëzgjatje të arsyeshme të përcaktuar dhe brenda afatit të periudhës tranzitore 30.9.2019 të miratuar nga ERE.”.

- Në lidhje me pikën 1 të këtij rekomandimi, konstatojmë se neni 21, pika 1, së cilës i referohet AK-ja, lidhet me: përcaktimin e tarifave dhe çmimeve të shërbimeve të energjisë elektrike dhe të gazit natyror për vitin pasardhës...

- Çmimi me të cilin OSHEE-ja blen në treg të parregulluar, është i përcaktuar nga oferta më e mirë, dhe nuk rregullohet nga ERE.

- Në lidhje me pikën 2 të këtij rekomandimi, konstatojmë se: nuk lidhet me objektin e shqyrtimit nga ERE. Fundi i periudhës tranzitore të përcaktuar me vendimin e Bordit të ERE-s nr. 146, datë 4.10.2019, është data 31.12.2019. ERE i është drejtuar AK-së, me kërkesën për opinion në lidhje me vendimin nr.123, datë 29.7.2019, mbi fillimin e procedurës për shqyrtimin e kërkesës së OSHEE sh.a. për një ndryshim në “Rregulloren për procedurat e blerjes së energjisë elektrike për mbulimin e humbjeve në rrjetet e shpërndarjes dhe të transmetimit dhe për blerjen e energjisë elektrike për të siguruar përmbushjen e detyrimeve të shërbimit publik”.

- Sa më sipër, në vijim edhe të arsyetimit të vendimit i cili shpreh qartë qëllimin e kërkesës së OSHEE sh.a., jo për një periudhë tranzitore, por edhe sa shpjeguar më lart e në këtë pikë të dispozitivit të vendimit, është e qartë që nuk jemi në kushtet e trajtimit të kësaj kërkeje për një periudhë tranzitore.

- ERE, e ka të gjithë lirinë, në kuptim të rregullatorit të sektorit të energjisë elektrike dhe gazit natyror, si dhe për shkak të kompetencave me të cilat e ka veshur ligji, që të shprehet edhe përtej objektit të kërkesës nëse konstaton se vetë kërkesa nuk adreson edhe problematikat që ajo mund të gjenerojë. Pikërisht për këtë arsye, në këtë vendimarrje, ERE nuk është ndalur vetëm në trajtimin e kërkesës objekt shqyrtimi, qëndrimin për të cilën e ka dhënë në pikën e parë të vendimit nr. 123/2019, por në pikën 2 të tij, pikërisht për shkak të gjetjeve të veta dhe konstatimeve se kërkesa siç ishte paraqitur, nuk adresonte problematikat që mund të gjeneronte, është shprehur si në vijim:

“OSHEE sh.a. të japë sqarime që lidhen me ndryshimet e propozuara në pikën 1 të këtij vendimi, në lidhje me kushtet e shpalljes së ofertës për blerjen e energjisë elektrike, si dhe kushtet e negociimit të afatit të pagesave, duke garantuar një proces të drejtë e të ligjshëm për të gjithë tregtarët pjesëmarrës”.

- Pikërisht në vijim të sa lënë detyrë në këtë pikë të vendimit të sipërcituar, OSHEE sh.a. me të sajën 14321/3, i është drejtuar ERE-s me sqarimet e nevojshme dhe saktësimin e objektit të kërkesës.

- Për gjithë sa më sipër shpjeguar, konstatojmë se për AK-në, ka qenë i paqartë trajtimi i kërkesës së ERE-s për opinion në lidhje me vendimin nr. 123/2019, e konkluzionet apo rekomandimet e përcjella, adresojnë çështje që nuk lidhen me këtë vendimarrje.

- Enti Rregullator i Energjisë, me qëllim sigurimin e një vendimarrje sa më të drejtë, transparente e gjithëpërfshirëse, me shkresën nr. 610, ka njoftuar të gjitha palët e interesit urdhrin e kryetarit të ERE-s nr. 119/2019 për zhvillimin e një seance dëgjimore ku palët të marrin e të japin sqarime në lidhje me kërkesën e OSHEE sh.a. për të cilën ERE ka filluar procedurën me vendimin e Bordit nr. 123/2019.

- Në këtë seancë të organizuar në ERE, në datën 14.10.2019, kanë marrë pjesë përfaqësues të OST-së, OSHEE-së, KESH-it, MIE-së, AK-së, Devoll Hydropower, Shoqatës së Furnizuesve AAES.

- Gjatë diskutimeve në seancën dëgjimore u shprehën qëndrimet e palëve të interesit pjesëmarrës në këtë seancë të cilat po i përmbledhim në mënyrë sintetike në vijim.

- Shoqata e Furnizuesve të Energjisë AAES përcolli një përshkrim më të detajuar të qëndrimeve për të cilat ka bërë me dije më herët ERE-n shkresërisht, shpjegimet për të cilat i kemi dhënë më sipër.

- Ministria e Infrastrukturës dhe Energjisë mbështeti propozimin e OSHEE-së për ndryshimet në rregullore.

- KESH sh.a. dhe OST sh.a. nuk kishin komente apo kundërshtime mbi këtë propozim.

- Nga ana e OSHEE sh.a. u dhanë shpjegime mbi legjitimitimin e kërkesës për ndryshime duke vendosur theksin në faktin që liria kontraktore në këtë marrëdhënie duhet të jetë e garantuar, por sigurisht brenda kornizave ligjore që përcakton ERE në këtë rregullore, por duke saktësuar që në çdo rast, me miratimin e kërkesës së tyre nga ana e ERE-s asnjë tregtar nuk do të trajtohet në mënyrë diskriminuese e të diferencuar.

Konkluzione:

- Mbështetur në nenin 19, germa “I”, të ligjit nr. 43/2015, “Për sektorin e energjisë elektrike”, ERE l) miraton, me propozim të të licencuarve rregullat për shitjen, blerjen dhe shkëmbimin e energjisë elektrike, që kryhen nga prodhuesit dhe furnizuesit, të ngarkuar me detyrimin e shërbimit publik;

- Në nenin 62, pika 2, si dhe nenin 69, germa “ë”, të ligjit nr. 43/2015 “Për sektorin e energjisë elektrike”, i ndryshuar, parashikohet se procedurat e prokurimit të energjisë elektrike miratohen nga ERE, pas propozimit të Operatorit të Sistemit të Transmetimit dhe të Operatorit të Sistemit të Shpërndarjes.

- Me vendimin nr. 103, datë 23.6.2016 është miratuar “Rregullorja për procedurat e blerjes së energjisë elektrike për mbulimin e humbjeve në rrjetet e shpërndarjes dhe të transmetimit dhe për blerjen dhe shitjen e energjisë elektrike për të siguruar përmbushjen e detyrimeve të shërbimit publik”.

- Mbështetur në nenin 2, pika 1, të kësaj rregulloreje, objekti i saj është të përcaktojë procedurat e blerjes dhe shitjes së energjisë elektrike sipas nenit 6 më poshtë nga Operatori i Sistemit të Shpërndarjes, Operatori i Sistemit të Transmetimit dhe çdo kompani tjetër e energjisë elektrike për të cilën janë vendosur detyrimet e shërbimit publik (PSO) nga kompanitë e licencuara për tregtimin e energjisë elektrike.

- Mbështetur në nenin 2, pika 2, të kësaj rregulloreje, parashikohet se:

Qëllimi i kësaj rregulloreje, është:

a) të përcaktojë procedura eficiente dhe praktike për kompanitë e energjisë elektrike, të cilave u jemi referuar në paragrafin 1, të këtij neni, për blerjen e energjisë elektrike nga tregtarët;

b) të sigurojë blerje të energjisë elektrike me çmime sa më të ulëta;

c) të nxisë pjesëmarrjen e tregtarëve në procesin e blerjes së energjisë elektrike;

d) të nxisë konkurrencën në procesin e blerjes së energjisë elektrike;

e) të sigurojë transparencë, si dhe një trajtim të barabartë për të gjithë tregtarët dhe pjesëmarrësit në procedurat e blerjes së energjisë elektrike;

f) të përputhet me legjislacionin në fuqi.

- Në kuptim të sa më sipër, është e qartë që përcaktimi i afateve të shlyerjes së pagesave siç parashikuar në nenin 20 të rregullores, nuk lidhet thelbësisht me konceptin e rregullimit të procedurës.

- Ligji, në vetvete parashikon ngushtësisht detyrimin kryesor për përcaktimin e procedurave, me të cilat të kryhen transaksionet për qëllimet për të cilat është hartuar kjo rregullore.

- Ndryshe nga akte të tjera nënligjore të parashikuara si detyrim për miratim nga ERE, ligjbërësi në nenin 19, germa “I” të ligjit, është kufizuar në përcaktimin e procedurave, duke vlerësuar këto të fundit si thelbësore për të garantuar transparencën, mbrojtjen e konkurrencës së ndershme, trajtimin e barabartë dhe jodiskriminues të tregtarëve të energjisë elektrike, në këtë marrëdhënie.

Në vlerësim të analizës së mësipërme, dhe shpjegimeve të dhëna nga OSHEE sh.a., dhe të palëve të përfshira në këtë proces, si dhe të ERE-s në lidhje me kërkesën për ndryshimin e nenit 20 të rregullores së miratuar me vendimin e Bordit të ERE-s nr. 103, datë 23.6.2016, parimet e mësipërme, të cituara edhe nenin 2, pika 2, të kësaj rregulloreje, janë të mbrojtura dhe të garantuara për sa kohë, procedura, termat dhe afatet e prokurimit të energjisë elektrike për pjesëtarët e tregut të ngarkuar me detyrimin e shërbimit publik nga tregtarët në tregun e parregulluar janë të njëjta dhe transparente.

Për gjithë sa më sipër, Bordi i ERE-s

VENDOSI:

1. Miratimin e kërkesës së OSHEE sh.a., për ndryshimin e nenit 20, germa “a” të “Rregullores për procedurat e blerjes së energjisë elektrike për mbulimin e humbjeve në rrjetet e shpërndarjes dhe të transmetimit dhe për blerjen e energjisë elektrike për të siguruar përmbytjen e detyrimeve të shërbimit publik”, duke përcaktuar:

Afatet e pagesës që i ngarkuari me detyrimin e shërbimit publik do të aplikojë për tregtarët në procedurat për prokurimin e energjisë elektrike do të përcaktohen në ftesën për pjesëmarrje.

2. Pas nenit 20, germa “a”, shtohen pikat 1, 2, 3 dhe 4, me përmbajtje:

1. *Blerësi duhet të realizojë një analizë të argumentuar dhe dokumentuar për të përcaktuar afatet e pagesës në përputhje me mundësitë financiare likuiduese të vetë blerësit. Në çdo rast blerësi duhet të përcaktojë afate të pagesës, të tilla që të sigurojnë parimet e blerjes së energjisë elektrike në tregun e parregulluar me kosto sa më të ulët.*

2. *Afati i pagesës, i vendosur në ftesën për ofertë, duhet të jetë i njëjtë për të gjitha shoqëritë tregtare të ftuara në procedurën që do të realizohet nga i ngarkuari me detyrimin e shërbimit publik.*

3. *Kushtet, termat dhe afatet e parashikuara në ftesën për pjesëmarrje të të ngarkuarit me detyrimin e shërbimit publik, duhet të jenë të njëjta me kontratën e nënshkruar me shoqërinë fituese.*

4. *Pagesa e faturave të shoqërive tregtare pjesëmarrëse në procedurat e blerjes së energjisë elektrike të jetë proporcionalisht e njëjtë për çdo shoqëri që ka fatura të lëshuara ndaj blerësit të ngarkuar me detyrimin e shërbimit publik për të njëjtën periudhë lëvrimi. Pagesa e plotë e faturave të shoqërive tregtare për të njëjtën periudhë lëvrimi, të realizohet në të njëjtën periudhë kohore nga blerësi i ngarkuar me detyrimin e shërbimit publik.*

3. Pas nenit 19, shtohet pika 6, me përmbajtje: *Blerësit e ngarkuar me detyrimin e shërbimit publik, të informojnë periodikisht çdo muaj në ERE mbi ecurinë e zbatimit të kësaj rregulloreje si dhe zbatimin e parimeve të transparencës, trajtimit të barabartë dhe jodiskriminues të tregtarëve të energjisë elektrike, si dhe të argumentojnë për çdo procedurë blerjeje afatet e pagesës të përcaktuara në përputhje me mundësitë financiare likuiduese të të ngarkuarit me detyrimin e shërbimit publik.*

4. Ky vendim është objekt rishikimi nga ERE.

5. Drejtoria e Çështjeve Ligjore të njoftojë palët e interesuara për vendimin e Bordit të ERE-s.

Ky vendim hyn në fuqi më 1.1.2020.

Për këtë vendim mund të kërkohet rishikim brenda 7 ditëve kalendarike, si dhe mund të bëhet ankim në Gjykatën Administrative Tiranë, brenda 30 ditëve kalendarike nga dita e publikimit në Fletoren Zyrtare.

Ky vendim botohet në Fletoren Zyrtare.

KRYETAR
Petrit Ahmeti